

Na osnovu člana 54. stav (4) Zakona o korištenju obnovljivih izvora energije i efikasne kogeneracije („Službene novine Federacije Bosne i Hercegovine“, broj: 82/23) Federalni ministar energije, rudarstva i industrije, donosi

PRAVILNIK O ZAJEDNICAMA OBNOVLJIVE ENERGIJE

I. Opšte odredbe

Predmet Pravilnika

Član 1.

Ovim Pravilnikom o zajednicama obnovljive energije (u daljem tekstu: „**Pravilnik**“) se uređuju:

- a) osnivanje i način sticanja statusa zajednice obnovljive energije (u daljem tekstu: „**Zajednica**“) koje su definisane Zakonom o korištenju obnovljivih izvora energije i efikasne kogeneracije (Službene novine Federacije Bosne i Hercegovine, broj: 82/23) (u daljem tekstu: „**Zakon**“),
- b) kriteriji koje Zajednice moraju ispunjavati radi ostvarivanja prava propisanih Zakonom,
- c) udio dobiti koji se mora investirati u projekte od koristi za lokalnu zajednicu,
- d) međusobni odnos članova Zajednice.
- e) tehnički aspekti Zajednice,
- f) način nadgledanja rada Zajednice,
- g) druga pitanja od značaja za rad i funkcionisanje Zajednica.

Definicije

Član 2.

- (1) Pojmovi koji se koriste u ovom Pravilniku imaju značenja određena Zakonom.
- (2) U ovom se Pravilniku koriste i izrazi koji u smislu ovog Pravilnika imaju sljedeća značenja:
 - a. **Zajednica** označava pravno lice:
 - 1) Koje proizvodi energiju iz obnovljivih izvora i zasniva se na otvorenom i dobrovoljnom učešću, autonomna je i efektivno se kontroliše od strane članova suvlasnika koji se nalaze u blizini projekta postrojenja obnovljive energije i koje je u vlasništvu i razvijeno od tog pravnog lica,

- 2) čiji su članovi fizička lica, mala/srednja preduzeća kako su definisani propisima koji uređuju njihov rad i/ili jedinice lokalne samouprave uspostavljene propisima kojima se uređuje lokalna samouprava, te ustanove i preduzeća u većinskom vlasništvu jedinica lokalne samouprave,
- 3) čija je primarna svrha da obezbijedi ekološke, ekonomske ili društvene koristi za svoje članove ili za lokalne oblasti gdje su locirana, a ne samo finansijsku dobit,
- b. **Registar Zajednica** označava registar koji vodi Federalno ministarstvo energije, rudarstva i industrije u skladu sa ovim Pravilnikom;
- c. **Federalni ministar** označava ministra energije, rudarstva i industrije u Vladi Federacije Bosne i Hercegovine;
- d. **Federalno ministarstvo** označava Federalno ministarstvo energije, rudarstva i industrije Federacije Bosne i Hercegovine
- e. **Projekat korištenja obnovljivog izvora** označava pripremu i izgradnju postrojenja koja koriste obnovljive izvore energije, a koji je upisan u Registar projekata;
- f. **Postrojenje** u smislu ovog Pravilnika označava postrojenje za proizvodnju energije iz obnovljivih izvora, te je u vlasništvu Zajednice.

II. Opšti uslovi za sticanja statusa Zajednice

Član 3.

- (1) Zajednica je pravno lice osnovano u skladu sa propisima kojima se uređuje osnivanje i rad tih pravnih lica.
- (2) Pravno lice iz stava 1. prije podnošenja zahtjeva za sticanje statusa zajednice iz člana 8. ovog Pravilnika mora ispunjavati uslove propisane ovim Pravilnikom, te osnivački akt Zajednice mora biti usklađen sa odredbama članova 4. do 6. i članova 16. do 20. ovog Pravilnika.
- (3) Primarna djelatnost Zajednice je proizvodnja energije iz obnovljivih izvora, a primarna svrha Zajednice jeste da obezbijedi ekološke, ekonomske ili društvene koristi za svoje članove ili za lokalne oblasti gdje su locirana, a ne samo finansijsku dobit.
- (4) Pravno lice iz stav (1) ovog člana, svojstvo Zajednice stiče rješenjem Federalnog ministra.

- (5) Na pitanja u vezi sa radom i funkcionisanjem Zajednica koja nisu uređena Zakonom i ovim Pravilnikom, primenjuju se odgovarajući propisi kojima je uređen rad tih pravnih lica.

Sastav tijela Zajednice

Član 4.

- (1) Zajednica mora imati organ u kojem su zastupljeni svi članovi Zajednice (skupština, upravni odbor i sl.) i osobu ovlaštenu za zastupanje i predstavljanje Zajednice (direktor, predsjednik upravnog odbora i sl.).
- (2) Zajednica može imati i druge organe osnovane u skladu i na način uređen propisima kojima se uređuje rad takve forme pravnih lica.

Članstvo Zajednice

Član 5.

- (1) Zajednica mora imati najmanje dva člana.
- (2) Članstvo u Zajednici je otvoreno za sve članove koji ispunjavaju kriterije u pogledu članstva iz člana 6. ovog Pravilnika.

Minimalni uslovi za sticanje statusa Zajednice

Član 6.

- (1) Pored broja članova definisanog u članu 5., Zajednica mora ispunjavati sljedeće uslove:
- a) Zajednica se formira radi provođenja jednog ili više Projekata korištenja obnovljivih izvora energije u kojem direktno učestvuju fizička i pravna lica;
 - b) Svi članovi Zajednice moraju imati prebivalište ili sjedište na području općine u kojoj se izvodi Projekat korištenja obnovljivog izvora ili u općini čija se teritorija graniči sa teritorijom općine u kojoj se izvodi Projekat korištenja obnovljivog izvora;
 - c) Svi članovi Zajednice su na području jednog operatora distributivnog sistema.

(2) Ukoliko se Zajednica formira radi realizacije Projekata korištenja obnovljivih izvora energije koji se odnosi na proizvodnju električne energije, pored ispunjavanja uslova propisanih u stavu (1) ovog člana, Zajednica mora i ispunjavati uslov da svi članovi Zajednice imaju istog snabdjevača, koji će preuzimati višak proizvedene energije.

(3) Ukoliko se Zajednica formira radi realizacije Projekata korištenja obnovljivih izvora energije koji se odnosi na toplotnu energiju iz obnovljivih izvora, pored ispunjavanja uslova propisanih u stavu (1) ovog člana, Zajednica mora obezbijediti i saglasnost za realizaciju Projekta korištenja obnovljivog izvora kojom se potvrđuje da postoje tehnički uslovi za realizaciju planiranog Projekta korištenja obnovljivog izvora, izdatu od strane nadležnog organa ili drugog pravnog lica koje je ovlašteno da upravlja distributivnim sistemom za toplotnu energiju na području Zajednice.

III. Postupak sticanja statusa Zajednice

Nadležnost i postupak sticanja statusa Zajednice

Član 7.

- (1) Status Zajednice dodjeljuje Federalni ministar, nakon sprovedenog postupka, svojim rješenjem.
- (2) U postupku odlučivanja po podnesenom zahtjevu za sticanje statusa Zajednice, Federalno ministarstvo postupa u skladu sa Zakonom o upravnom postupku („Službene novine Federacije Bosne i Hercegovine“, broj: 2/98, 48/99 i 61/22).

Podnošenje zahtjeva za sticanje statusa Zajednice

Član 8.

- (1) Postupak za sticanje statusa Zajednice se pokreće po zahtjevu pravnog lica iz člana 3. ovog Pravilnika.
- (2) Zahtjev sadrži podatke o ispunjenosti uslova propisanih ovim Pravilnikom, uključujući naziv i vrstu pravne forme podnosioca zahtjeva, spisak članova sa prebivalištem, odnosno sjedištem i podatke o Projektu korištenja obnovljivog izvora i Postrojenju.

(3) Zahtjev se podnosi na popunjenom obrascu iz Priloga 1 ovog Pravilnika.

Potrebna dokumentacija za sticanje statusa Zajednice

Član 9.

(1) Uz zahtjev iz člana 8. ovog Pravilnika se podnosi sljedeća dokumentacija:

- a) Izvod iz odgovarajućeg registra kod kojeg je registrovan podnosilac zahtjeva;
- b) Osnivači akt pravnog lica koje podnosi zahtjev za sticanje statusa Zajednice usklađen sa uslovima iz ovog Pravilnika;
- c) Spisak sa potpisima članova Zajednice kojim su se saglasili sa podnošenjem zahtjeva za sticanje statusa Zajednice;
- d) Uvjerenje o prebivalištu za fizička lica članove Zajednice, odnosno izvodi iz odgovarajućeg registra kod kojeg su registrovana pravna lica članovi Zajednice;
- e) Izjava o realizaciji Projekta korištenja obnovljivog izvora (koja je sadržana na obrascu u Prilogu 1 ovog Pravilnika);
- f) Dokaz o vlasništvu lokacije za Projekat korištenja obnovljivog izvora (izvodi iz evidencija o vlasništvu na nepokretnostima, ugovor, i sl.), izdate dozvole, odobrenja i saglasnosti za Postrojenje (ukoliko je primjenjivo);
- g) Kopije ugovora o priključenju na distributivnu mrežu za sve članove Zajednice.

(2) Za Zajednice iz člana 6. stav (2) ovog Pravilnika, pored dokumenata navedenih u stavu (1) ovog člana, uz zahtjev se dostavljaju i kopije ugovora sa snabdjevačem za svakog člana Zajednice.

(3) Za Zajednice iz člana 6. stav (3) ovog Pravilnika, pored dokumenata navedenih u stavu (1) ovog člana, uz zahtjev se dostavlja i saglasnost za realizaciju Projekta korištenja obnovljivog izvora od strane nadležnog organa ili drugog pravnog lica koje je ovlašteno da upravljaju distributivnim sistemom za toplotnu energiju na području Zajednice, kojom se potvrđuje da postoje tehnički uslovi za realizaciju planiranog Projekta korištenja obnovljivog izvora.

(4) Dokumenti navedeni u stavovima (1) do (3) se prilažu u originalu ili u ovjerenj kopiji ne starijoj od tri mjeseca.

(5) Federalno ministarstvo ima pravo da po svojoj slobodnoj ocjeni zatraži i druge dokumente i informacije radi ispitivanja ispunjenosti uslova za sticanje statusa Zajednice.

Ispitivanje podnesenog zahtjeva

Član 10.

Nakon prijema zahtjeva, Federalno ministarstvo ispituje da li je zahtjev zaprimljen na odgovarajućem obrascu i da li su uz zahtjev dostavljeni svi propisani dokumenti.

Otklanjanje nedostataka u zahtjevu

Član 11.

- (1) Ukoliko zahtjev nije kompletan, Federalno ministarstvo će pozvati podnosioca zahtjeva da zahtjev dopuni te mu za to ostaviti rok od 15 dana.
- (2) Ukoliko podnosilac zahtjeva ne kompletira zahtjev u ostavljenom roku, Federalni ministar će odbaciti zahtjev.

Donošenje rješenja

Član 12.

- (1) Nakon što utvrdi da je zahtjev kompletan Federalni ministar će u postupku odlučiti o zahtjevu, o čemu će donijeti odgovarajuće rješenje u roku od 30 dana nakon što je primljen kompletan zahtjev.

Sadržaj rješenja o sticanju statusa Zajednice

Član 13.

- (1) Ukoliko utvrdi da su ispunjeni uslovi propisani Zakonom i ovim Pravilnikom, Federalni ministar donosi rješenje kojim se odobrava sticanje statusa Zajednice i upis takvog statusa u Registar Zajednica.
- (2) Rješenje is prethodnog stava se objavljuje na internet stranicama Federalnog ministarstva.

Odbijanje zahtjeva za sticanje statusa Zajednice

Član 14.

- (1) Ukoliko utvrdi da nisu ispunjeni uslovi propisani Zakonom i ovim Pravilnikom, Federalni ministar zaključkom odbija zahtjev za sticanje statusa Zajednice.
- (2) Kod odbijanja zahtjeva, u obrazloženju rješenja Federalni ministar mora navesti sve razloge za takvu odluku.

Vođenje Registra Zajednica

Član 15.

- (1) Nadležni organ uspostavlja i vodi Registar zajednica u elektronskom obliku kao centralnu evidenciju Zajednica.
- (2) Registar Zajednica sadrži podatke o:
 - a) Nazivu Zajednice,
 - b) Pravnoj formi Zajednice,
 - c) Članovima Zajednice;
 - d) Podsticaju koji je Zajednica dobila,
 - e) Opisu Projekta korištenja obnovljivog izvora (vrsta jednog ili više Postrojenja, lokacija, status (faza razvoja Projekta korištenja obnovljivog izvora, pribavljena građevinska dozvola, pribavljena upotrebna dozvola)).
- (3) Registar Zajednica je javan i dostupan na internet stranicama Federalnog ministarstva, sa izuzetkom podataka na koje se primjenjuju propisi o zaštiti ličnih podataka.

IV. Prava i obaveze članova Zajednice

Pristupanje, istupanje i isključenje članova

Član 16.

- (1) Zajednici mogu pristupiti novi članovi ukoliko ispunjavaju uslove koji se odnose na status i kriterije vezane za članstvo, na način kako je to propisano propisima koji regulišu rad određene pravne forme zajednice i kako je propisano člancima 5. i 6. ovog Pravilnika.

- (2) Član može dobrovoljno istupiti iz Zajednice u svakom trenutku, a može biti isključen ukoliko prestane ispunjavati uslove koji se odnose na status i kriterije vezane za članstvo, na način kako je to propisano propisima koji regulišu rad određene pravne forme zajednice ili ukoliko prestane ispunjavati uslove propisane člancima 5. i 6. ovog Pravilnika.
- (3) Zajednice mogu svojim osnivačkim aktima ova pitanja dodatno urediti na način koji nije u suprotnosti sa Zakonom i ovim Pravilnikom.

Međusobni odnosi članova Zajednice

Član 17.

- (1) Međusobni odnosi članova Zajednice se zasnivaju sa naglaskom na ravnopravnost članova, dobrovoljnost i međusobno uvažavanje.
- (2) Članovi imaju pravo biti konsultovani i odlučivati o svim pitanjima koja se tiču rada Zajednice.

Pravo kontrole rada Zajednice

Član 18.

Svaki član ima pravo uvida u sve akte Zajednice i može zatražiti sve informacije koje se odnose na rad Zajednice.

Uplate članova

Član 19.

Osnivačkim aktom Zajednice se uređuje način i uplate finansijskog doprinosa članova, u skladu sa propisima kojima je uređen rad odgovarajućeg pravnog lica.

Raspodjela koristi unutar Zajednice

Član 20.

- (1) Raspodjela energije, dobiti i ostalih koristi unutar Zajednice se vrši na način uređen osnivačkim aktom Zajednice.

- (2) Višak energije koju Zajednica proizvede, može biti ponuđena na tržištu tek nakon što budu zadovoljene potrebe članova za energijom, a od tako ostvarene neto dobiti minimalno 20% se koristi za investicije u projekte kojima se unapređuje uslovi za život stanovništva na području Zajednice.

Ostala pitanja od značaja za rad Zajednice

Član 21.

Ostala pitanja od značaja rad i funkcionisanje Zajednice se uređuju osnivačkim aktom Zajednice.

V. Tehnički aspekti rada Zajednice

Priključak na mrežu

Član 22.

- (1) Priključenje Zajednica vrši se preko zajedničkog priključka kompletne Zajednice sa pripadajućim obračunskim mjernim mjestom ili preko zasebnih priključaka sa pripadajućim obračunskim mjernim mjestima pojedinačnih objekata članova Zajednice, elektrana, uređaja za skladištenje i drugih uređaja za potrebe Zajednice.
- (2) Zajednice imaju prioritet kod priključka na mrežu, u mjeri u kojoj to nije suprotno drugim propisima koji uređuju ovo pitanje.

Mjerenje utrošene energije u Zajednici

Član 23.

- (1) Mjerna mjesta krajnjih kupaca i ostalih objekata koji čine Zajednicu opremaju se pametnim mjernim uređajima.
- (2) Svaki član ima pravo pristupa podacima o utrošenoj energiji u okviru Zajednice.

Podjela energije između članova

Član 24.

- (1) Operator distributivnog sistema je dužan da za Zajednicu mjeri i dostavlja joj podatke o mjerenjima na svim brojljima u okviru Zajednice.
- (2) Zajednica u svom sjedištu čuva popis obračunskih mjernih mjesta proizvodnih postrojenja, popis obračunskih mjernih mjesta postrojenja za skladištenje energije i popis obračunskih mjernih mjesta članova Zajednice.

VI. Nadzor nad radom Zajednice, obavještanje, gubitak statusa i izvještanje

Nadgledanje rada zajednice

Član 25.

- (1) Federalno ministarstvo može preduzimati kontrolu rada Zajednice u pogledu ispunjenosti uslova za status Zajednice.
- (2) Zajednica je dužna sarađivati sa predstavnicima Federalnog ministarstva prilikom kontrole i dostaviti sve podatke, informacije i dokumentaciju po zahtjevu Federalnog ministarstva.
- (3) Federalno ministarstvo može izdavati uputstva Zajednici radi otklanjanja nedostataka.

Obaveza obavještanja o promjenama podataka u Registru Zajednica

Član 26.

- (1) Zajednica je obavezna da obavijesti Federalno ministarstvo o svakoj promjeni podataka upisanih u Registar Zajednica (uključujući, ali se ne ograničavajući na promjenu statusa Projekta korištenja obnovljivog izvora) i činjenica koje su bitne za ispunjavanje uslova za sticanje statusa Zajednice, u roku od 15 dana od nastanka takvih promjena.
- (2) Nakon pribavljanja upotrebne dozvole za Postrojenje, Zajednica je dužna da dostavi uz prijavu promjene statusa Projekta korištenja obnovljivog izvora i ovjerenu kopiju upotrebne dozvole za Postrojenje radi dokazivanja instalirane snage Postrojenja.

- (3) Zajednica je obavezna obavijestiti Federalno ministarstvo o svakom novom Projektu korištenja obnovljivog izvora koji Zajednica provodi sa navođenjem podataka o novom Projektu korištenja obnovljivog izvora kako su navedeni u Izjavi o realizaciji projekta obnovljivih izvora (koja je sadržana na obrascu u Prilogu 1 ovog Pravilnika), radi upisa tih podataka u Registar Zajednica, i to u roku od 15 dana od dana donošenja odluke nadležnog organa Zajednice o realizaciji takvog novog Projekta korištenja obnovljivog izvora, te izvještavati o svakoj promjeni statusa novog Projekta korištenja obnovljivog izvora.

Sankcije i gubitak statusa Zajednice

Član 27.

Kada utvrdi da Zajednica više ne ispunjava uslove propisane ovim Pravilnikom ili kada po ocjeni Federalnog ministarstva nastupi zastoj u radu Zajednice (npr. kada Zajednica ne podnosi redovne izvještaje, ako je zaustavljenjo provođenje Projekta korištenja obnovljivog izvora, i sl.), Federalni ministar može donijeti rješenje kojim se oduzima status Zajednice i Zajednica se briše iz Registra Zajednica.

Izvještavanje

Član 28.

Zajednica je dužna jednom godišnje do 31. marta tekuće godine, dostaviti Federalnom ministarstvu izvještaj o radu za proteklu godinu na obrascu u Prilogu 2 ovog Pravilnika zajedno sa relevantnim dokumentima.

VII. Odnos Zajednice i energetske zajednice građana

Član 29.

- (1) Zajednice se u odnosu na energetske zajednice građana regulisane Zakonom o električnoj energiji („Službene novine Federacije Bosne i Hercegovine“, broj: 60/23), razlikuju po odsustvu kriterija teritorijalnosti članstva kako je definisano Zakonom i ovim Pravilnikom, te je aktivnost Zajednica u odnosu na energetske zajednice građana ograničena na proizvodnju energije iz obnovljivih izvora.
- (2) Zajednice mogu prerasti u energetske zajednice građana, ukoliko za to ispunjavaju uslove definisane propisima kojima se uređuju energetske zajednice građana, uz

istovremeno zadržavanje statusa Zajednice pod uslovom da nastave ispunjavati minimum uslova propisanih Zakonom i ovim Pravilnikom.

- (3) Ukoliko Zajednica stekne status energetske zajednice građana, uz istovremeno zadržavanje statusa Zajednice, dužna je voditi odvojene knjigovodstvene evidencije za aktivnosti Zajednice.

VIII. Prelazne i završne odredbe

Uspostavljanje Registra Zajednica

Član 30.

Federalno ministarstvo će u Zakonom propisanom roku izvršiti sve pripremne radnje i uspostaviti Registar zajednica.

Izuzće

Član 31.

Odredbe ovog Pravilnika se neće primjenjivati na Zajednice koje se formiraju radi realizacije Projekata korištenja obnovljivih izvora energije koji se odnose na toplotnu energiju iz obnovljivih izvora, do donošenja relevantnih propisa o toplotnoj energiji u skladu sa Zakonom o energiji i regulaciji energetskih djelatnosti u Federaciji Bosne i Hercegovine (Službene novine Federacije Bosne i Hercegovine, broj: 60/23).

Stupanje na snagu Pravilnika

Član 32.

Ovaj Pravilnik stupa na snagu osmog dana od dana objavljivanja u "Službenim novinama Federacije Bosne i Hercegovine".

PRILOZI

Prilog 1

Obrazac zahtjeva za sticanje statusa Zajednice

Prilog 2

Obrazac za izvještavanje

PRILOG 1: Obrazac

Federalno ministarstvo energije, rudarstva i industrije Federacije Bosne i Hercegovine

**ZAHTJEV ZA STICANJE STATUSA
ZAJEDNICE OBNOVLJIVIH IZVORA ENERGIJE**

Podnosilac zahtjeva:
(naziv i sjedište podnosioca zahtjeva)

.....
.....
.....

Podnosimo zahtjev za sticanje statusa zajednice obnovljivih izvora energije u skladu sa članom 8. Pravilnika o zajednicama obnovljivih izvora energije ([unijeti]).

A. OPŠTI PODACI PODNOSIOCA ZAHTJEVA		
Naziv (ime)		
Sjedište		
Adresa		
Matični broj		
Telefon/telefaks		
Elektronska adresa		
Odgovorno lice	Ime	
	Prezime	
	Adresa	

B. PODACI O ČLANOVIMA ZAJEDNICE	
Naziv (ime)	Adresa prebivališta / sjedište

C. IZJAVA O REALIZACIJI PROJEKTA KORIŠTENJA OBNOVLJIVOG IZVORA

Ovim putem izjavljujemo da [unijeti puni naziv i adresu Zajednice] pod punom materijalnom i krivičnom odgovornošću da imamo namjeru realizovati projekat izgradnje postrojenja za proizvodnju energije iz obnovljivih izvora sljedećih karakteristika:

Vrsta Projekta	[unijeti o kojoj vrsti projekta se radi]
Lokacija	[unijeti tačnu lokaciju i jedinicu lokalne samouprave]
Planirana snaga	[unijeti planiranu snagu Postrojenja]
Namjena planiranog projekta	[unijeti podatak da li će se energija koristiti samo za vlastite potrebe ili i za prodaju na tržištu.]
Ukupna planirana proizvodnja	[unijeti planiranu proizvodnju, ako je riječ o više postrojenja onda pojedinačna i ukupna planirana proizvodnja]
Procijenjena investicija.	[unijeti planiranu snagu Postrojenja]
Procijenjeni trenutak započinjanja izgradnje	[unijeti]
Procjena trajanja izgradnje	[unijeti]
Način finansiranja projekta	[unijeti planirane udjele članova Zajednice u investiciji/vlasništvu i oblik finansiranja]

D. TRENUTNI STATUS PROJEKTA KORIŠTENJA OBNOVLJIVOG IZVORA

(označiti sa X)

Faza razvoja Projekta korištenja obnovljivog izvora	
Pribavljeno odobrenje za građenje / građevinska dozvola	
Pribavljena upotrebna dozvola	

E. DOKAZI PRILOŽENI UZ ZAHTJEV

Red br.	DOKAZI (original ili ovjerena kopija)	PRILOŽENO (označiti)	
1	Izvod iz odgovarajućeg registra kod kojeg je registrovan podnosilac zahtjeva;		
2	Osnivači akt pravnog lica koje podnosi zahtjev za sticanje statusa Zajednice usklađen sa uslovima iz ovog Pravilnika;		
3	Spisak sa potpisima članova Zajednice kojim su se saglasili sa podnošenjem zahtjeva za sticanje statusa Zajednice;		
4	Uvjerenje o prebivalištu za fizička lica članove Zajednice, odnosno izvodi iz odgovarajućeg registra kod kojeg su registrovana pravna lica članovi Zajednice, ne starije od šest mjeseci;		
5	Izjava o realizaciji Projekta korištenja obnovljivog izvora, koja je sadržana u ovom Prilogu		
6	Dokaz o vlasništvu lokacije za Projekat korištenja obnovljivog izvora (izvodi iz evidencija o vlasništvu na nepokretnostima, ugovor, i sl.), izdate dozvole, odobrenja i saglasnosti za Postrojenje (ukoliko je primjenjivo);		
8	Ugovori o priključenju na distributivnu mrežu za sve članove Zajednice;		
9	Ugovori sa snabdjevačem za svakog člana Zajednice (ukoliko je primjenjivo);		
10	Saglasnost nadležnog organa ili drugog pravnog lica koje je ovlašteno da upravlja distributivnim sistemom za toplotnu energiju na području Zajednice (ukoliko je primjenjivo).		

Potpisom na ovom zahtjevu potvrđujemo da su svi navedeni podaci tačni.

Datum podnošenja Zahtjeva
Zahtjeva

Podnosilac

potpis ovlaštenog lica

Pečat i

PRILOG 2: Obrazac za izvještavanje

(naziv i sjedište Zajednice)

.....

.....

Za: Federalno ministarstvo energije, rudarstva i industrije Federacije Bosne i Hercegovine

Izvještaj o radu za [unijeti] godinu

A. Značajni događaji u implementaciji Projekta korištenja obnovljivog izvora	
[opisati značajne događaje u fazi razvoja Projekta korištenja obnovljivog izvora u protekloj godini (npr. izrada idejnog, glavnog ili drugog projekta, početak gradnje, i sl.), započinjanje novih Projekata korištenja obnovljivih izvora, i sl.]	

B. Podaci o radu Postrojenja¹	
Proizvedene količine energije	[unijeti]
Količine predate članovima Zajednice	[unijeti]
Količine prodate trećim licima	[unijeti]

C. Finansijski pokazatelji	
Ostvareni prihodi od prodaje energije	[unijeti]
Ostvarena dobit	[unijeti]
Dobit raspodjeljena članovima Zajednice	[unijeti]
Iznos investiran u u projekte kojima se unapređuje uslovi za život stanovništva na području Zajednice	[unijeti]

D. Prilozi uz izvještaj		
Red br.	Prilog	PRILOŽENO (označiti)
1	Finansijski izvještaj (bilans stanja / bilans	

¹Ukoliko zajednica ima više postrojenja unose se podaci za svako postrojenje i kumulativni prikaz za cijelu Zajednicu.

	uspjeha za proteklu godinu)		
2	[unijeti]		

Datum podnošenja izvještaja
izvještaja _____

Podnosilac

ovlaštenog lica

Pečat i potpis